

DISSERTATIO INAUGVRALIS MEDICA
DE
VOMITORIORVM VSV
IN FEBRIBVS.

Q V A M
C O N S E N S V
ILLVSTRIS MEDICORVM ORDINIS
P R O
*CONSEQVENDIS SVMMIS IN MEDICINA
ET CHIRVURGIA HONORIBVS*
IN
ACADEMIA GEORGIA AVGVSTA
A. D. XVII. MARTII MDCCLXXX.

PVBlice DEFENDET
A V C T O R
IEREMIAS IACOBVS WOLFF
OFFENBACENSIS.

GOETTINGAE,
Litteris JO. CHRIST. DIETERICH
ACAD. TYPOGR.



Digitized by the Internet Archive
in 2019 with funding from
Wellcome Library

<https://archive.org/details/b30792125>

S E R E N I S S I M O
P R I N C I P I E T D O M I N O

D O M I N O

W O L F G A N G O

E R N E S T O I I.

P R I N C I P I

Y S E N B V R G E N S I E T B ü D I N G E N S I E T C. E T C. E T C.

D O M I N O S V O

C L E M E N T I S S I M O

HANC
QVALEM CVNQVE Scriptionem
Academicam
PIA AC DEVOTISSIMA MENTE
OFFERT AC CONSECRAT

HVMILLIMVS ET DEVOTISSIMVS
IEREMIAS IACOBVS WOLFF
A VCTOR.

PROOEMIUM.

Quae ventriculo conuerso, sordes et quicquid ibi et in vicinia haeret, per os exturbant, *emetica* sic dicta, ad censum remediorum pertinent, quae heroicorum nomine insigniuntur. His enim adnumerare ea, non facile dubitabit quisquam, qui eminentem eorum virtutem, minori quoque dosi efficacem, et effectus in corpore humano quos producunt, magnos et violentos norit. Quemadmodum vero heroica sub legitimo vsu modo in salutarem medicinam cedunt, ita etiam vomitoria recta dosi iustoque tempore data egregie in morborum curatione profunt. Praestantissimo enim hoc remediorum genere non solum quicquid quisquiliarum in ventriculo et intestino huic propiori latet, cito et via proxima expellitur, indeque multi morbi saepius in herba suffocantur, alii mitiores redduntur; sed alius etiam, mouetur,

obstructa referantur, circulus humorum promouetur, turbæ sæpius systemati nervoso infestæ sedantur, et diuresi ac diaphoresi aucta multis modis materies morbida oppugnatur et e corpore humano eiicitur.

Proinde ad febres omnis generis curandas magni momenti emetica esse, integra et refracta dosi exhibita, nostra maxime ætate cognitum est; et libenter ideo hanc materiem a RICHTERO, *illustri Regis Archiatro, Praeceptore ad cineres usque pie colendo*, mihi commendatam, nimirum de vomitoriorum usu in febribus, dissertationem inauguralem cum scribere in animo esset, arripui, cum bene perspicerem, quam late hoc argumentum pateret. Quod vero quomodo prosequutus sim, *Lectores æqui* iudicent, quos quippe, meae tenuitatis mihi probe conscius, enixe rogo, ut si minus recte hoc argumentum elaboratum sit, auctori iuueni, tyroni in arte medica condonent.

§. I.

Noxas saepe grauiiores corpori humano, siue e for-
 dibus primarum viarum, siue etiam ex alia materie
 morbosa imminentes, vomitu natura spontaneo aut
 prorsus arcet, aut imminuit, id quod experientia
 quotidiana docet. Cibos aliquis ingessit coctu difficiles,
 duriores, vel nimiam eorum copiam, et natura hosti-
 lem materiam protinus vomitu exturbat; bilis ex ira-
 cundia in alio mota est, copia et acrimonia peccans,
 et natura vomitu has turbas sedat; febris accenditur a
 bile abundante et corrupta, et naturae vomitiones et
 diarrhoeam excitantis ope aut prorsus tollitur, aut certe
 infringitur *a*); infesta corpus clanculum contagia intra-
 uere, et natura vomitu non modo hostilem inuasionem in-
 dicat, sed fordibus etiam primarum viarum inde expulsis,
 imminensem morbum saepe mitiorem reddit. Alia huius
 generis exempla cuique memoria suppeditabit, veraque
 esse intelliget, quae acute hac de re olim pronunciauit

WIL-

a) In HIPPOCRATIS Libr. I. *de morbis vulgarib.* exemplum legitur
 mulieris febre maligna liberatae, cum vomitione crebra, biliosa,
 flaua secessissent, et sudor obortus esset. Cf. *Henr. COPE Demonstratio medico pract. Prognost.* HIPPOCR. edit Ill. BALDINGERI
 p. 134. et similia in aduersariis medicorum plurima leguntur.

WILLISIVS *b)*, ita dicens: adeo summa diuini conditoris prouidentia cautum est, ut pro certiore corporis humani tamquam arcis custodia, quoties hostis externus ingruet aut inter proprias accolae seditio exorietur, illico extra primos aditus, scilicet ventriculi porticum hospites quicunque tamquam personae suspectae eiiciantur. Quam vero cum natura viam monstret, mirum non est, veteres iamiam medicos naturae vestigia sequutos esse, et HIPPOCRATEM *c)*, AETIVM *d)*, ALEXANDRVM TRALLIANVM *e)*, CELSVM *f)*, ut alios e veteribus nunc taceam, vomitum scientia praesertim in febrium curatione in vsum vocasse. Nec fieri potuit, quin a veteribus commendata per vomitum euacuatio, quam cum ista per secessum comparans WILLISIVS *g)* in nonnullis affectibus plus prodesse, quam purgationem decies repetitam affirmavit, summis omni tempore medicis in artis exercitio in vsum esset, praesertim ad febres profligandas, quas saepius a colluue impura in primis viis congesta oriri aut exasperari viderant.

b) *Pharmaceutice rational.* p. 25.

c) Cf. potissimum *Aphor.* XXII. Sect. I. *Aphorism.* XIX. Sect. II. *Aphor.* XVII. Sect. IV.

d) *De re medic.* Lib. IV. Cap. CXXX.

e) *De arte medica* passim.

f) *De medicin.* Lib. I. p. 29. Lib. II. p. 87. edit: KRAVSE.

g) l. c. p. 24.

derant. Sicuti vero nullum fere adeo efficax proficuumque remedium inueniatur, quod non etiam obesse possit, si promiscue et non sub iusta cautione, aut peruersa dosi exhibeatur; ita quoque emetica noxas, de quibus mihi infra dicendum erit, subinde attulerunt. His igitur et dubia fortassis dosi vomitoriorum moniti medici, tentarunt ea sine dubio minori et refracta dosi exhibere, inprimis cum infantibus et tenerioris habitus aegris quandoque vomitoria offerenda essent. Noua igitur esse nequit haec ratio exhibendi vomitoria, et patet omnino, *Franc. de le Boe* SYLVIVM stibiata iamiam in refracta dosi commendasse *h)*, sapam scilicet vomitoriam, e vitro antimonii paratam; quem sequutus ALBRECHT *i)*, pariter vomitoria antimonialia in admodum refracta dosi exhibita et aliquamdiu continuata laudauit. Nec difficile foret, e scriptis HOFFMANNI, STAHLII aliorumque medicorum testimonia colligere, vomitoria praesertim ea, quae ex stibio et scillae radice parantur, pridem refracta dosi in usu fuisse.

§. II.

h) Cf. SCHVLZII *Praelectiones de viribus et usu medicamentorum* &c. p. 287. 369.

i) In *Ephemerid. N. C.* Dec. II. Ann. VI. p. 46.

§. II.

Quoniam autem vario modo vomitoria differunt, par non est ratio, praesertim in febrium curatione quae nam exhibeantur. Olim aquam tepidam cum sale, aut oleo, aut melle mixtam, copia sufficiente vna vice ingerendam, ad vomitum ciendum apprime laudarunt; verum aquae tepidae in qua carduus benedictus intabueraat prius, potatio, qua Baro de WASSENAER *k)* misere interemptus est, hoc remedium infidum reddidit.

Plerisque igitur nostra aetate medicis alia vomitoria placent, praesertim ipecacuanhae radix, cui asarum substitui posse docuit A LINNE' *l)*. Asari quidem radix forma pulueris ad scrupulum vnum, drachmam dimidiam, immo drachmam integram, aut asari folia ad numerum sex contusa et macerata frigide per noctem in vini vncia vna, exhibita, vomitum cient et aluum mouent, ac in intermittentibus diuturnis aliisque morbis auxilio fuere, vti tradidit *Illustr. MURRAY m)*, *Praeceptor ad cineres usque pie colendus*. Viribus vero cum asarum inferius sit ipecacuanhae radice, et acredine sua dis-

k) HERM. BOERHAAVE *rarior. morbor. historiae* edit. Ill. BALDINGER p. 3. seq.

l) *Amoen. Acad.* T. VII. p. 307.

m) *Apparatus medicaminum.* Vol. I, p. 360.

displiceat, recte ipecacuanha anteponitur. Haec propterea, ut verbis *Illustr. MURRAY n)* utar, emeticum nunc est omnium consuetissimum et tritissimum, nec infantibus tenellis repudiandum, nec praesente febre incongruum, quum absque calore operetur. Dosis quondam maior huius radice in pulverem redactae, nimirum ad drachmam usque aegris data est; recentiori vero aevo cognitum est, minorem dosin eisdem effectus producere, et minimam saepe efficacissimam esse. *Illustr. PRINGLE*, referente *Ill. SPIELMANN o)* singulis horis ipecacuanhae grana quinque praebet, usque dum vomitus surgat. *Ill. MURRAY p)*, si saburra tenacior vexet et tempore parcendum sit, placet mos, qui apud Anglos item Germanos diu obtinuit, scrupulo circiter vni ipecacuanhae granum vnum vel alterum tartari emetici stimuli causa adiungere. Sic alii quinque, decem, aut quindecim grana, alii scrupulum vnum, aut drachmam dimidiam ipecacuanhae vel solius, vel cum sacchari, aut salis cuiusdam, aut rhabarbari parca quantitate mixtae pro dosi ad vomitum mouendum exhibent, habita simul aetatis, corporis constitutionis rel. ratione. *Illustr.*

BAL-

n) l. c. Vol. I. p. 257.

o) *Instit. mat. medicae* p. 618.

p) l. c. p. 528.

BALDINGER q), *Praeceptor pietate et obseruantia maxima prosequendus*, infusum commendat aquosum, ex pulueris radicis ipecacuanhae drachma vna et dimidia, corticis aurantiorum Curass. drachmis duabus, Cremoris tartari drachma dimidia, cum vnciiis quatuor aquae fontanae ebullientis parandum, cui oxymellis squillitici vnciam dimidiam addit. Hoc infusum cochleatim exhibet, asseritque, istud primarum viarum sordes, et bilem eliminare per vomitum et per vias vrinae, hinc in omni genere febrium acutarum remittentium, intermittentium optimam esse medicinam et non raro praeuenter exanthemata cutis, quae sint cum febre, et ab impura colluuie primarum viarum gignerentur. Alii infusum ipecacuanhae cum vino digestionem per noctem paratum ad emesin ciendam laudant, quod vero absente modo febre conducit r).

Praestantissimum autem remedium ad febres curandas ipecacuanham esse, docet eximia virtus, quae in ipsa latet; nam non vomitum solum mouet, sed aluum etiam, immo, quod merito mireris, leniter adstringit, diuresin ac diaphoresin auget; praeterea vis febrifuga, antidynterica, antiseptica, teste STOLLE *) et spasmos sopiens in ea notatur. Quod vim eius antispasmodicam att-

q) Cf. *Pharmacopoea Edinb.* edit. III. BALDINGER in additamentis. p. 250.

r) Cf. *Illustr.* MURRAY l. c. Vol. I. pag. 530.

*) R. M. P. I. p. 192.

tinet, ea praesertim, si radix haec in admodum refracta dosi repetitis vicibus exhibetur, manifesta est. Quartam grani partem radices bis in horae unius spatio eo fine dedit RICHTER s), *Illustris Regis Archiater*, et similem dosin cum successu in grauissimis spasticis varii generis affectionibus Cl. MICHAELIS t), ut AKENSIDE aliosque huius virtutis testes grauissimos nunc praeteream. Probabile autem mihi videtur, hanc vim ipecacuanhae spasmos fugantem, quae in curatione febrium tanti momenti est, in quibus tot spastica occurrunt symptomata, maxime a facultate radices vomitum mouente pendere, qua spasticos motus in ventriculo et vicinis partibus excitat; nouimus enim, filere interdum spasmos, obortis aliis aut propinquis aut validioribus; spasticos motus vero ipecacuanham etiam in minima dosi oblatam, creare posse, vomitus docet, quem tunc etiam quandoque ciet. Id quod hanc sententiam verosimillimam reddit, obseruatio est, qua etiam in emeticis aliis refracta dosi exhibitis virtus antispasmodica detecta est u). Sed vela contrahere cogor, qui iusto diutius in ipecacuanha moratus sum. Scillae radix, quae vi resolvente

B 3

ac

s) *Abhandlung von den Brüchen* Th. I. p. 218. et *chirurgische Bibliothek* B. III. St. 4. p. 641.

t) *De angina polyposa siue membranacea*: p. 241.

u) Cf. Cl. MICHAELIS lib. cit. p. 240. qui plura exempla adfert.

ac diuretica inclaruit, ad emefin ciendam raro in vsum vocatur, praesertim in febrium medela, quod ventriculum offendit, et nimis irritat. Nec praeparata eius facile tunc eo scopo adhibentur, oxymelite excepto, quod quidem solum aegris propinari non solet, sed aliis emeticis, forma fluida praescriptis ad drachmas binas quatuorue additur. Magis in vfu sunt vomitoria, quae ex classe antimonialium petuntur, tartarus scilicet emeticus et sulphur antimonii auratum tertiae praecipitationis, quae ad grana duo, tria, immo quatuor pro dosi vel forma pulueris, vel haustus dantur. Inprimis haec tunc conueniunt, vbi infesta sordium colluies cito e primis viis remouenda.

Valida vis emetica in antimonialibus est, et non modo cito operantur, sed ventris imi etiam viscera probe succutiunt. Praeterea viscida optime incidunt, sudorem et vrinam pellunt, potenterque resoluunt, praesertim in refracta dosi exhibita et diu continuata. Vi etiam antispasmodica, stibiata exigua dosi data polere videntur; certe tartarum emeticum minori dosi exhibitum in epilepsia magni fecit b. m. WERLHOF v), in infantum conuulsionibus aliisque affectionibus spasticis b. m. HIRSCHEL w), mihiq̃ue probabile videtur,

ful-

v) *Oper. medica* T. II. p. 726.

w) *Gedanken die fallende Sucht betreffend* p. 42.

fulphuris antimonii aurati tertiae praecipitationis et kermes mineralis eam vim, qua sputa in pulmonum inflammationibus suppressa protinus saepe restitunt, nullam aliam esse, quam spasmos sopientem, cum resolvens eorum vis tam cito opitulari non posset, sputaque spasmis, in omni inflammata parte obviis, veri similiter suppressantur.

Exiguas tartari emetici non modo, sed aliorum etiam medicamentorum e classe antimonialium doses nuperi ad febres curandas maximis extollunt laudibus; sed de his mox sermo erit, ubi de refractae emeticorum doseos effectu salutari in febrium curatione fusius agetur. Haec vero usitata sunt emetica; noui quidem superesse alia multa, v. c. vitriolum album, ad pestem auertendam commendatum; cum autem vel infida sint, vel enarratis virtute inferiora, vomitorio- rum in febribus adhibendorum pomoeria ulterius extendere nolui.

§. III.

Spinosas et inutiles quaestiones, qua virtute vomitoria emesin moueant, in quas partes agant, quomodo ventriculum afficiant, aliasque, ab argumento meo alienas hic nihil moror; sufficiat, de effectibus emeticorum hoc loco generaliora quaedam proposuisse. Spasmos

smos inducere vomitoria, eosque causam vomitus cuiuslibet proximam esse, e serie spasticorum symptomatum, quae in nauseante a medicina emetica sumta annotantur, elucet.

Ideo vis emeticorum, praesertim antimonialium liberaliori manu propinatorum, non tantum intra ventriculi et duodeni pomoeria subsistit, ut verbis utar b. m. FR. HOFFMANNI x), sed intimius penetrando, in contiguas etiam adiacentes partes effectus suos propagat et maxime ductus biliarios attentat, eosdemque concutit et crispat, ut redundantius biliosum humorem erucent: unde nonnunquam tanta biliosae materiae copia iterato vomitu eiicitur, quanta neutiquam duodeni latibulis excipi potuisset ac comprehendi. Hac de causa, quod nimirum virtus emeticorum latius patet, euacuationem per vomitum longe purgationi aluinae praefarendam esse asseruit WILLISIVS y). Ista enim recte monuit, non modo phlegma ponderosum stomachi plis coalescens, quod cathartica caetera quaevis praeterlaberentur, veluti scopis purgari, sed partes etiam vicinas, pancreas, mesenterium, lien ipsumque iecur, concussione valida commoueri, adeo ut obstructiones in iis factae, etiam sanguinis et humorum stagnationes quae-

x) Opuscul. medic. varii argumenti p. 423.

y) l. c. p. 34.

quaecunque hoc remedii genere facillime amouerentur. Plerumque vero, emetico dato, ratio eorum, quae per os exturbantur, haec est: primo vomitu eiicitur illud, quod in cauitate ventriculi fluctuat; dein quicquid viscosi phlegmatis villis eius adhaeret, aut in plicis reconditur; si vellicatio perseverat, serosi humores reiiciuntur; postea spasma duodeno eiusque ductibus communicato, bilis et succus pancreaticus, e meatibus extorti, inque ventriculum suffusi, egeruntur z). Bilis igitur ultimo exturbatur, in biliosis vero morbis saepius statim ab initio. Si vomitus perdurat, sanguis denique secedit. Perdurat vero vomitus, vel quod particula vomitorii acris in ventriculo restat, vel quod vomitione ventriculus sensilior redditus, quouis leuiori etiam stimulo potulentorum, bilis rel. ad spasmos cietur. Periculosum igitur est, emetica valida, aut maiori dosi exhibere, cum e crebra validaque vomitione vomitus cruentus, herniae, prolapsus, animi deliquia, conuulsiones, mors repentina, aliaque mala annotata sint, et mitiora nonnunquam vomitoria, iusta dosi data noxas istas inferant. Quo licet opprobrio liberari vomitoria non possint, praestant tamen

z) WILLISIVS l. c. p. 31.

tamen longe ea euacuantia, quae aluum modo subducunt. Haec enim et tardius operantur, et fordes multas intactas relinquunt, et robur ac tonum ventriculi et intestinorum imminuunt, immo totum corpus debilitant; in emeticis vero plane alia ratio est. Nec reliquis, quae emeticis adscripsi, per plura emunctoria materiem morbidam eliminantibus, viribus pollent aluum purgantia.

Refractae emeticorum doses nihil detrimenti afferunt, ideoque omni tempore exhiberi possunt. Tunc quidem prudens medicus eas non dabit, vbi cita euacuatio per vomitum indicatur; alioqui maxime commodae atque vtilissimae exiguae doses emeticorum sunt. Namque secunda, tertia aut quarta vice exhibitae vomitum interdum ciunt, isque mitis est, et aegri modo fordes eructare videntur; tum etiam hae optime fordes digerunt, ideoque ad euacuationem praeparant, immo per aluum quoque exturbant; praeterea perspirationem, et expectorationem promouent, vrinam pellunt, quid? quod virtute antispasmodica pollent, quem admodum nuper docuit MEYER, *Vir Exper. a*). Quibusdam methodus placet, ita exhibendi emetica, vt nauseam continuam moueant, et certum omnino est, ad ex-

a) Diff. de eximio ipecacuanhae nec non alior. quorundam emet. refracta dosi exhibitorum vsu. p. 5. 6.

excretiones fere omnes augendas meliorem vix inueniri posse methodum.

Haec etiam methodus Praeceptoribus meis optimis, *Illustr.* BALDINGERO et *Illustr.* RICHTERO placet, et in collegiis insignes et praeclaros effectus praedicant, quos inde in multis morbis notauere. *Illustr.* BALDINGER *b)*, alibi iam iam in febre tertiana refractas ipecacuanhae doses laudauit, consentiens cum GIANELLA, radici huic facultatem abstergendi, meatus referandi, ac infarctus resoluendi adscribente; et ob eas virtutes tartari emetici aliquot grana in aliquot vnciis aquae fontanae soluta commendauit *c)*. *Illustr.* Reg. Archiater RICHTERVS eadem ratione tartarum emeticum exhibet, et addit etiam interdum solutioni sal mirabile Glauberi aut etiam sal quoddam aliud. LIND *d)* maiorem vim febres fugandi tartaro emetico tribuit, quam vino antimonii; exhibuit vero cum successu in febribus remittentibus continuis quavis hora sexta tartari emetici granum dimidium cum sacchari aliquot granis mixtum. Ali-
bi

b) *Krankheiten einer Armee* p. 293.

c) *Pharmacop. Edinburg.* in additament. p. 264.

d) *Versuch über die Krankheiten, denen die Europaeer in heißen Clima-
ten unterworfen sind*, p. 26, 262.

bi e) suadet, vt simulac Europaeus in regionibus calidioribus febre corriperetur, vomitorio aut cathartico primis viis probe expurgatis, siue tartarus emeticus, siue vinum antimonii exigua dosi, siue etiam sequens medicina exhiberetur: Rec. falsi Cornu Cerui semi scrupulum, succi Limoniorum drachmas tres, vel q. s. ad saturationem, aquae menthae vulgaris simplicis drachmas decem, tincturae stomachicae drachmam vnā, vini antimonialis a guttis X. ad guttas XL. (vel potius in vicem vini antimonialis, tartari emetici quartam partem grani) syrapi e corticibus aurantiorum drachmam vnā, misc. In febribus continuis et quidem tunc, quando aegri stupore, et sopore, cum magno labore et oppressione organorum vitalium corripiebantur, vini antimoniatum drachmam vnā aqua dilutam quouis bihorio pro dosi dedit, dosi etiam in progressu aucta, donec vncia vini assumpta esset, vel medicina notabiles effectus exseruisset. Eadem methodo in febribus curandis fere omnes clari medici in Anglia vtuntur, vt modo tartarum emeticum refracta dosi vel forma pulueris, vel in aqua solutum, vel aliis medicamentis fluidis admixtum, exhibeant, aut loco huius vinum antimoniatum, vel solum parca dosi, vel aqua dilutum, vel potionibus additum aegris propinent; hac enim ratione stibiata adhi-

e) l. c, p. 222.

hibuere HUXHAM *f*), GRANT *g*), CLARK *h*), MACBRIDE *i*) aliique multi. In Gallia loco antimonialium enarratorum frequentius kermes minerali medici vtuntur *k*), et quem fugit, hodieque a multis antimonium diaphoreticum in febribus curandis in vsum vocari.

§. IV.

Magna vero cum vtilitate emetica, siue sufficiente ad vomitum ciendum, siue refracta dosi fere in quouis febrium genere adhiberi, tot praeclara medicorum illustrum et fide dignissimorum testimonia, quae hic apponere superfluum foret, spondent. Enimvero ne sinistro cum euentu salutaris medicina detur, necesse est bene sciat medicus, quando in febribus vomitoria integra vel refracta dosi exhibenda, in quibus febribus optimo cum euentu administrata sint, denique sub quibus cautionibus haec aegris offerenda sint, et quas temere data emetica noxas afferant; atqui hae quaestio-

C 3

nes

f) Oper. edit. REICHEL T. II. p. 206. et passim.

g) *Beobachtungen über die Natur und Heilung der Fieber.* p. 677.

h) *Beobachtungen über die Krankheiten auf langen Reisen nach heißen Gegenden &c.* passim.

i) *Systematische Einleitung in die theoretische und praktische Arzneykunst* Th. II. p. 477. 479.

k) LIND l. c. p. 261.

nes sunt, quae nunc dilucidandae veniunt. Quod primam quaestionem attinet: quando aegris febre laborantibus vomitoria dari possint debeantque; duplicem ea significatum habet, quae scilicet indicantia, ea postulent, et quo morbi tempore exhiberi possint. In prius vero si inquiremus, patet, tunc modo proprie indicari vomitoria, sicuti in morbis aliis, ita etiam in febribus, si absentibus aliis signis emesis prohibentibus, sordium in primis viis colluies praesto sit, eaque versus superiora turgescat.

Signa autem colluiei et turgescientiae, referente TH. GLASS ¹⁾, haec sunt: corporis totius lassitudo, impotentia subita, horrores, lingua sordibus obsessa, os amarum, cibi fastidium, oris ventriculi morsus, praecordiorum molestiae, et tumores facile digitis cedentes, pectoris angustiae et oppressio, dolor ventriculi, item lateris sub septo transverso, et intra costas haerens; sed absque praecordiorum inflammatione (qui nonnunquam cruciatus thoracis dicitur, nonnunquam dolor lateris, sursum ad claviculas non tendens) extremorum frigus, capitis totius grauitates et dolores, vertigo, oculorum caligines, mentis marcor, animi abiectio, inquietudo, anxietas, iactationes, (si modo inflammatio absit).

At

¹⁾ *Commentarii XII. de febribus* edit. *Illustr.* BALDINGER p. 74.

At haec non omnia semper dicta ratione adfunt, vt saepius dictitantibus ex his signis certioribus quibusdam, v. c. nausea, vomitu spontaneo, vertigine, lingua fordida, ructibus etc. emetica medici in artis exercitio versati intrepide exhibeant; deinde etiam interdum signa haec obscuriora sunt, praesertim si vnum alterumque desit, quo in casu ad alia attendere debet medicus, nimirum num morbus post cibos duriores comestos, epulas lautiores natus sit, num a causa epidemica, endemica bilis et primarum viarum fordes exsuperent rel. Sic contraria ex parte interdum oris amarities, nausea cum vomendi conatu, ardor circa pectus, anxietas praecordia stringens, saliva frequens, tremor oris, quae alias vomitoria postulant, praesto sunt et tamen non expedit, his indiciis obsequi, cum a solo motu spastico et contractorio ventriculi, siue idiopathice siue sympathice affecti, ista symptomata oriri possint *m*), ubi subinde valde noceret, si emetica exhiberentur. Ita saepenumero conatus ad vomendum a regurgitante sanguine ad vasa ventriculi in grauidis, mensium vel haemorrhoidum suppressione laborantibus, etiam ex alia causa sub insultu apoplectico, in vehementi tussi, calculo, suffocatione hysterica, passione colica, iliaca aliisque affectionibus

na-

m) FR. HOFFMANNVS l. c. p. 444.

nascuntur, vbi summe periculofum foret, vomitum
ciere.

Quandoque etiam figna enarrata ifta emefin exigen-
tia vel plane, vel magnam partem defunt, et medici ta-
men fagaciores, vel quod faburram profundius delite-
fcere cognofcant, vel vt materiem morbidam, ad inte-
riora aut neruofum fyftema fortaffis migrantem aut
iam iam delatam, protinus magnis vomitorii motibus
ad exterar partes pellant, vel denique vt miasma no-
uiffime corpus ingreffum mature exturbent, emetica da-
re minime dubitant. Quod contagia attinet, mira fae-
pius emeticorum virtus eft, qua ea cum falua, vt vi-
detur, mixta et deglutita, e corpore expellunt. In
morbis igitur, FR. HOFFMANNVS *n*) ait, qui contagio
ferpunt et infigniter pernicialis indolis funt, vt peftis,
petechiales febres, febris acuta cum phrenitide, fiue
fic dictus morbus Hungaricus, emeticum glifcente ad-
huc fub initium miasmate, cum alexipharmaco datum,
fummam promittit fecuritatem, et faepenumero capitales
has aegritudines prima in herba feliciffime iugulat. Exhi-
bendum vero effet vomitorium, interprete TH. GLASSO),
ipfo plane febris initio, fi quidem optio detur; ita
enim fiet, vt ab horrendis illis fympomatibus ex hu-
mo-

n) l. c. p. 431.

o) l. c. p. 86.

morum in ventriculo locisque vicinis delitescentium illuie ortum ducentibus praemuniamus, immo vero et fortasse morbum ipsis quasi incunabulis opprimamus; qui alias cum aegroti periculo grandescet, et longaeuus euadet; nutritus nimirum dictis humoribus, qui vel substantia sua in penitiores corporis partes transmissi, cum sanguine commiscentur, et ex ipsa mora peiores facti, atque venenata prauitate inquinati, ex foco suo iugiter pertranseunti sanguini, malignam auram afflabunt.

Cum autem per totum febrium decursum, siue quod ingenium ferat febrium, praesertim gastricarum, siue quod sero accersitus medicus sit, sordium ac turgesceniae signa praesto esse possint, aut alia symptomata, emesis exigentia, accedere queant, in quouis febrium tempore, sub cruditatis, coctionis et instantis criseos signis, modo vires ferant, vomitorium exhiberi potest o). Moment vero omnes, nisi summa vrgeat necessitas, in emeticis exhibendis, tempus exacerbationum vitare, et declinante modo accessione, impetu aut vigore morbi, tam

o) SYDENHAM die febris vndecimo vomitum imperare non dubitauit, etiam cum aeger vomiturire iam desisset, neque sine fructu Cf. *Oper.* p. 146. BRENDÉL *Diff. de seriori usu euacuantium in quibusdam acutis* resp. SCHVLZE. et Cl. RADEFELD *Diff. de euacuantium usu in febrium acutarum tam initio quam decursu*, §. IX.

tam in febribus intermittentibus, quam continuis et acutis vomitoria dare. Emetica enim, iudice FR. HOFFMANNO *p*), actiuiora omnia et ventriculum et reliquas nerueas corporis partes, spasticis strictionibus tentant, et sollicitant; sub morborum autem accessione, motu et impetu, systema tam vasorum, quam membranarum neruearum, iam spasmodicis commotionibus agitur, adeoque motuum impetus non potest non ab eiusmodi drasticis cum insigni detrimento notabiliter augeri atque intendi. Displicet igitur mihi methodus, breui ante paroxysmum in febribus intermittentibus emetica exhibendi, quod turbas in toto corpore summe spasticas appropinquantes augent, et declinante aut finito paroxysmo, non modo maiori cum securitate, sed etiam, quia excretiones criticas vomitoria intendunt, meliori cum successu propinari possunt.

Saepenumero vno emetico sordes in primis viis congestae non omnes exturbantur, sed exhibitis incidentibus et digerentibus denuo turgescunt; in hoc igitur casu salutariter iterum vomitus cieri potest. Refractas emeticorum doses vomitum interdum, saepius aluum mouere, sordes digerere, vrinam et perspirabile pellere, spasmos fugare dixi. Testimonium adiungo *Cel. STOLLE* *), de refractis ipecacuanhae dosibus ita dis-

p) l. c. p. 444.

*) R. M. T. I. p. 194.

ferentis: exiguae hae ipecacuanhae doses continuas vomitiones, subiinde et vomitum excitant, maioremque hac ratione humorum salivarium, lentescentium, glandulas infarciunt et ipsius bilis vesiculam distendentis, irritantis, putrescentis, ac iam iam resorbendae affluxum ad cauum ventriculi et intestina conciliant, quin et fordes biliosae iam absorptae, denuo reuocantur, ut excitato salutari vomitu, aluoque mota eliminentur. Ipse cum successu ipecacuanham refracta dosi exhibuit q), si os supra modum mucosum, dentes fordidi, lingua crassa, tenacique materie conspurcata consimilem et ventriculi et tubi intestinalis statum indicabant, et quotiescunque post primos vomitus insigne levamen non sequeretur.

Difficile igitur non est, perspicere, quando refractae emeticorum doses in febribus conueniant, cum si ne dubio propinari possint debeantque, quando fordes digerendae et euacuandae, obstructa referanda, perspirabile et lotium pellendum, et spasmi sopiendi sunt; et id etiam praerogatiuae penes has refractas doses est, quod debilioribus, grauidis, immo sub accessionibus, motu et impetu febrium, praesente inflammatione, aut diathesi phlogistica, aut congestione versus partem quam-

q) R. M. T. I. p. c.

quamdam, etc. exhiberi possint, praesertim si minimae doses offerantur.

Peculiarem vim febrifugam Angli antimonialibus, inprimis tartaro emetico et pulveri sic dicto *Doctōris IAMES* tribuunt. Verosimile autem mihi videtur, hanc nullam aliam esse, quam eam, qua causam materialem febrium tollunt, et spasticos motus et contractiones vasorum infringunt.

§. V.

Cum pleraeque febrium vel a fordibus primarum viarum oriantur, vel inde nutriantur, facile intelligitur, quam late usus emeticorum in febribus curandis pateat. Febres intermittentes saepius a solis vitiis in diaeta commissis, potissimum a cibis coctu difficilibus ingestis excluduntur, quas protinus saepe vomitoria data sistunt.

Hinc tertianas intermittentes ipecacuanha cum successu oppugnauit *Illustr. BALDINGER r)*, et MEYER s) tradidit methodum *Cel. WICHMANNI*, qua intermittentes ipecacuanhae, refracta dosi exhibitae usu profligat. In pauperioribus scilicet, quibus Cortex peruuianus nimis pretiosus est, eadem ratione, qua alias cortice, hac radice utitur. Euacuationibus rite praemissis,

omni

r) *Krankheiten einer Armee.* p. 290.

s) *Diff. cit.* p. 34.

omni trihorio granum vnum cum scrupulo vno sacchari albi aut magnesia praescribit, infuso theaeformi florum Chamomillae adiuuantis instar adhibito. Scrupuli duo ita administrati plerumque febrem tollunt, etiamsi nec sursum, nec deorsum euacuent; scrupulum tertium die octauo post sublatam febrem porrigit. Vbi opus est, roborandi causa vnciam vnam corticis peruuiani subiungit. Binos praeterea enarrauit casus *Exp.* MEYER *t*) febrium intermittantium, irregularis et tertianae, hac ratione a *Cel. WICHMANN*o persanatarum. WERLHOF *u*) in febribus intermittantibus soporosis, si sordium in primis viis congestarum indicia adessent, emeticum corticis peruuiani vsui praemisit, et instituit quidem euacuationem per vomitum finito paroxysmo praecipue infusi croci metallorum vncia circiter vna, medicamento, vti opinatur, si ex indicatione eo vtamur, nequaquam violento et quod, natura forsan inclinante, per inferiora etiam blande euacuet, neque deinceps adstringat, et velociter satis operetur, et in febribus et soporosis affectibus commendabile esset.

Quartanas inueteratas vomitum cientibus discutit ALEX. TRALLIANVS *x*), accessione vero incipiente vo-

D 3

mi-

t) l. c.

u) Oper. ex edit. *Cel. WICHMANNI* P. I. p. 114.

x) de arte medica edit. *HALLER*. Vol. II. p. 198.

mitum imperavit. Similiter GIANELLA y) ad quartanas curandas ipecacuanham laudat; hac enim radice, inquit, feliciter fugauimus quartanas febres, erraticas et illas, quae itentidem accenduntur, ita vt vere dici possit in gastrica et venosa cacochymia, vbi ventriculi succi eneruantur, vti hepar, pancreas, et intestinorum et mesenterii glandulae infarctae sunt et vbi lienis obstructions et durties persistunt, radicem ipecacuanhae, opportune tamen, rhabarbaro in consortium arcessito, singulare praesidium esse, ita ad nullum aliud praesidium cum huiusmodi praesidiis possit aequiparari.

Pari modo in febrium acutarum continuarum et remittentium medela euacuantium, praesertim emeticorum vsus nostra aetate magni aestimatur. Hae magnam partem gastricae sunt et a fordibus non raro biliosis, pituitosis, verminosis, aliisque corruptela putredinosa saepius infectis, oriuntur aut certe alimoniam inde habent. In febre biliosa simplici a TISSOTO z) aliisque claris medicis bene multis vsus emeticorum commendatus est; nec dubitabit quisquam, quotiescunque e re videbitur, in initio et decursu harum febrium vomitorium dare, si fordes, a quibus solis in primis viis collectis febres huius generis accenduntur, satis mobiles sint; praeser-

y) Cf. HALLER. *Diff. pract.* T. V.

z) *de febre bilios.* Lausan. p. 28. 29.

fertim cum natura nauseam vomitumque plerumque in his mouens, medentibus viam monstret. In his valde proficuum recentiores censent, emetica cum catharticiis coniungere, quod inde fordes citius eliminantur. Quemadmodum vero in biliosis simplicibus emetica cum successu adhibentur, ita maior omnino necessitas vrget, ea febre biliosa putrida laborantibus offerendi. In his enim fordes in praecordiis haerentes, putrida corruptela infectae sunt, et nisi cito via proxima exturbantur, longiore per canalem intestinorum via et ferius eliminantur, et in massam humorum resorbentur, et periculosas diarrhoeas, immo saepius infesto stimulo suo inflammationes viscerum abdominalium inferunt, aliaque mala creant. Salutis igitur fere spes omnis in emeticis mature dandis tunc ponenda. Saepius vero fieri solet, vt emetica in his febribus data, non vomitum, sed aluum moueant, et diarrhoeas funestas inducant. In hoc statu suadent quidam, praesertim Angli, vt emetico le-
ne opiatum v. c. tincturae thebaicae guttae quaedam addantur; alii vero, vt ventriculi regioni emplastrum vesicatorium imponatur, et deinde vomitorium exhibeatur. Maximi autem momenti esse, vomitum imperare in his febribus, verba НУХНАМИ a) praeclare docent: pro-
cul

a) *Oper. cit.* T. I. p. 243.

cul dubio vbi putrida colluies atque corrupta bilis in ventriculo et intestinis abundat, quantocyus hercle expurganda sunt, ni vis vsque fouere morbum, aucta in horas putredine. Nec in primis tantum viis, pergit, felices edit effectus vomitus, sed et per omnem vndique vasculorum compaginem, vbi lentescientes attenuat humores, putridosque expellit. In febre erysipelatoſa ipecacuanha vomitum ciuit *Illustr. EALDINGER b)*, nec mirum est, cum huiusmodi febres non nisi a bile, praesertim animi commotionibus alterata excludantur. Pleuritis et pleuropneumonia, et angina biliosa, quae perinde soboles bilis acrioris in ventriculo stagnantis, optimo cum successu emeticis oppugnantur. Febres verminosae, quas saepius putridas gastricas esse, declarauit VAN DEN BOSCH *c)*, subinde vomitoria flagitant, quibus interdum etiam vermes optime eiiciuntur. Petechiae, exanthema miliare et purpura, item scarlatina saepenumero a colluie impura in primis viis excluduntur, quae igitur euacuantium, ideoque etiam emeticorum mature exhibitorum vsu non modo optime auertuntur, sed quoque sanantur.

Ex-

b) Krankheiten einer Armee. p. 400.

*c) Historia constitutionis epidemicae verminosae edit. ACKERMANN
p. 57.*

Exanthema miliare purpuramque retrogressam, emeticum protinus exhibitum saepius in cutem reuocat. Variolarum et morbillorum curatio, vti ex SYDENHAMO, HUXHAMO, ROSENSTEINIO probauit Cl. RADEFELD d), ob febrem biliosam saepius coniunctam, et alias difficultates subinde vomitoria exigit. Febres catarrhales plerumque cum primarum viarum fordibus coniunctae sunt, et tunc facile in perniciosas degenerant, nisi saburra cito remouetur. Hinc emetica in his etiam saepe locum habent, et proficua sunt non modo, quod saburram eliminant, sed etiam quia cohibitum aut suppressum perspirabile restituunt. In febre catarrhali putrida Cl. MERTENS e) ipecacuanha et tartaro emetico vomitum mouit et tartarum emeticum etiam in aqua solutum refracta dosi exhibuit. Quamuis multi sint, et e summis medicis quidam, SYDENHAMVS scilicet, HOFFMANNVS, MEAD, HUXHAM, PRINGLE, alique quos nominatim adduxit Cel. WESTPHAL f), qui vomitoria ad curandas febres malignas laudent, tamen A. de HAEN g), et Cel. WESTPHAL h) utilitatem eorum in

d) Diff. cit. p. 28. 30.

e) *Observationes medicae* p. 15.

f) Diff. *de limitandis laudibus vomitoriorum ad curandas febres malignas* rel. in *sylloge select. Opusc. Illustr. BALDINGER* Vol. II.

g) *Rat. Med.* P. I. p. 10. seq. P. II. p. 2. seq. P. III. p. 5. seq.

h) Diff. cit.

in dubium vocarunt. Ideo vero DE HAEN laudes vomitoriorum tunc restrinxit, quod HIPPOCRATES absente febre, certe inflammatoria, et tunc modo vomitoria admisisset, vbi fordium versus superiora turgescencia adefset; quod quidam medici aut non meminissent emeticorum, aut praesente dicta fordium turgescencia modo in his febribus vomitum imperassent; quod DIEMERBROECKIUS experientia edoctus, emetica vituperasset; quod in quibusdam febribus malignis et epidemicis, etiam in febre a SYDENHAMO notata nocuissent, et denique ex omisso vomitorio nihil detrimenti notatum sit. *Cel. WESTPHALI*) autem ea de causa tunc emeticorum usum dissuadet, quod febres malignae in inflammationes ventriculi et intestinorum valde pronae essent, et signa emesis indicantia inde et ab aliis causis proficisci possint. Si, quid ego sentiam, ingenue aperire licet, quando labes malignitatis in nervoso systemate solo haereat, parum mihi vomitoria proficere posse videntur; si vero malignae febres complicatae sint cum biliosis, aut malignitas a bile circa praecordia delitescente, acriter k), pendeat, id quod multis in phrenitide videtur, nullum praestantius emeticis remedium inueniri posse reor. In febre putri-

i) Diff. cit. §. X.

k) VAN SWIETEN *Comment.* T. II, p. 271. seq.

trida neruosa emeticum dedit Cl. MERTENS *l)*, idem etiam in peste lenia vomitoria nonnullis leuamen attulisse refert *m)*. In febribus etiam inflammatoriis, si cum primarum viarum colluie coniunctae sunt, diathesi inflammatoria venaesectione prius et aliis etiam fortasse antiphlogisticis temperata, vomitoria conducunt. Taceo nunc febres alias morbosque febribus stipatos, v. c. dysenteriam, in quibus emetica profuisse legimus.

§. VI.

In febre maligna, vbi alia absit complicatio nocere posse emetica, dixi. Pari modo ea non proficua in febre putrida venosa, et lentis quibusdam censeo. Maxime vero perniciofa omnium consensu in inflammatione ventriculi et intestinorum sunt; subinde tamen bilis acrior in ventriculo inflammationem eius, et similiter saburra lentas et putridas mentitur. Nocere etiam emetica phthificis, haemoptoicis, plethoricis, grauidis, hernia, procidentia, cephalalgia vehementi, stricturnis spasticis nimis, febre effrena, laborantibus, aut summa virium prostratione affectis, nec non iis, quibus thorax angustior sit, aut qui ex alia causa non dispositi ad vomitum sint, creduntur. Inde patet, quae sub usu vo-
mi-

l) l. c. p. 62.

m) l. c. p. 136.

mitiorum cautiones obseruandae sint, ne temere data obsint. Noxas euacuantium, hinc emeticorum etiam, breuiter ita exposuit *Ill. GAVBIUS n)*: obsunt eo, quod plus iusto eiiciant, aut cum inutili etiam vtile, quod retineri debebat, aut minus praecipitanter, aut tempore modoue incongruis, aut non suis locis. Nocent et emunctoriis stimulo, attritu, dilatatione, anastomosi, infirmatione. Tunc vero, vbi indicantia emesin postulant, et conditiones aegri vomitoria admittunt, differenda non est efficacior medicina, sed mature et tempestiue, si fordes mobiles sunt, iusta dosi, cum potu conueniente v. c. decocto auenaceo, hordei, infuso Florum Chamomillae rel. offerenda est.

n) Instit. Pathol. p. 244.

ORATIO ANNIVERSARIA
IN
THEATRO
COLLEGII REGALIS
Medicorum *Londinensium*,

EX

H A R V Æ I Instituto

HABITA

Die xviii. Octobris A. D. MDCCXXXV.



LONDINI,
Typis GUL. BOWYER. MDCCXXXV.

ORNATISSIMO VIRO

RICHARDO PELLET

PRÆSIDI DIGNISSIMO,

SOCIISQUE DOCTISSIMIS


HANC

ORATIONEM

Illorum jussu editam

D. D. D.

EDVARDUS WILMOT.





ORATIO HARVÆANA.

PARUM abest, quin diem illis dicam, qui ante me ex hisce Rostris præclaros Dignitatis vestræ Autores laudibus extulerunt, non quòd urit eorum Gloria, sed quòd prægravat Posteris: Quem enim locum, non tactum, non ornatum, non exhaustum reliquerunt? Repetundarum sanè postulandi sunt, quòd nudam & spoliatam Provinciam mihi tradiderunt, quòd, quicquid in hâc causâ aut usui aut ornamento esse possit, præripuerunt, & pro suo vendicarunt. Splendidum proculdubiò peccatum! At videte, Viri Ornatissimi, ne vestro exemplo duram nimis

mis sanxiffe legem videamini, ut nemo posthac vel Medicus esse existimetur, nisi & Oratorem summum esse constet; ut nemini in suâ Arte fides habeatur, nisi omni aliâ & Arte & Scientiâ itidem polleat. Ut ut erit, lætus in Concionem prodeo, modò memineritis, me non spontè & ambitiosè in hoc, quicquid est operis, irruisse, sed jussum adesse; non ad famam aucupandam, sed grati animi indicia editurum.

NON frænum audit, neque cohiberi potest Oratio, quo minus præproperè evolet, & in HARVÆI nomen sese ante tempus effundat, qui annum hoc munus hîc loci posuit. Prærogativam enim quandam laudis sibi vindicare videatur, qui, ut aliis sua tribueretur laus, gratus sanxivit; & Prædicationis primas is jure fortiatur, qui, ut esset omnino Prædicatio, instituto & stipendio cavit. Quàm sapiente & pio Consilio hoc fecerit, cui non in confesso est? Quid enim honestius, quàm ut, qui benefecerint, benè etiam audirent? Quid æquius, quàm ut, quibus plurimas habeas gratias, iis cumulas agas? Quid sanctius, quàm Majorum famam conservare? Quid utilius, quàm Posterorum existimationi prospicere; quàm ex Patrum commemoratione filiorum virtutes elicere, & laudando quos decet, ne defuturi sint unquam, quos laudare possis, providere? Stimulat gloria; exemplis miro modo accendimur; neque illustres viros propius intueri possumus, quin ipsi erigamur, altiores fieri & eorum Ordini appropinquare videamur. Dum igitur ex lege HARVÆANA & egregii Præsidis jussu hoc munus

munus repeto, ne cui molestus sim, nisi qui exigui aut invidi animi fuerit, ne minus vobis gratus & acceptus veniam, non est verendum. Quid enim? vestra res agitur: Antecessorum præconiis, vestris viam præstruitis: Speratis, nec vana spes est, easdem apud Posterios laudes, quas ante vos natis quotannis læti renovatis: Eadem quæ hodie solenni more fit, vos expectat Commemoratio; nisi quòd eo amplior fuerit, quo vos digniores de quibus dicatur, eo ornatior, quo instructior is, qui de vobis dicturus est. Absit verò, procul absit, ut eximios, de quibus hodierno die agitur, viros, puerili quodam famæ studio delinitos, tam præclaram suam operam navâsse existimemus. Si quis in animum induxerit, eos tantos exantlâsse labores, tot beneficiis Humanum genus devinxisse, eo tantum consilio, ut levi Oratoris munere quolibet in Circulum redeunte anno perfricarentur; næ ille magnificè fatis de suâ perorandi arte, quantacunque demum ea sit, existimare videatur. Non quidem profectò eam indolem spirant tam splendida in suam ætatem & feros usque nepotes merita, quæ illi solummodò homines juvandi studio, bonis omnibus cum Diis ipsis communi, referre par est. Benefaciendi nimirum voluptate perfusi, & nescio quo virtutis amore concitati, abrepti, Præstantissimi illi viri, qui rem nostram posuerunt, auxerunt; ut laudem mereantur, id sibi negotii datum crediderunt, ut tribueretur, aliorum Pietati reliquerunt; sequentem se in æternum Gloriam læti conspexerunt; ut nunquam assequeretur, fecisse fatis habuerunt.

DIGNISSIMUS est, qui ex hoc insigni Choro, nomine evocetur & agmen ducat, Medicinæ apud nos Instaurator, Conditor, Commemorationis hodiernæ principium & fons: Cui debemus, quòd hìc loci convenimus, quòd hunc lætum diem agere, quòd intra hos parietes spectatissimorum virorum, qui vixerunt imagines, qui vivunt ora, intueri, venerari licet. An felicitatis, an laudis loco ponendum sit, nescio, eam inter ipsas literas & LINACRUM nostrum intercessisse necessitudinem, ut, hoc nato, illæ itidem renascerentur, & ortum suum aut illi deberent, aut cum illo communem haberent. Quippe per multa retrò secula, quicquid scientiæ erat, vel è terrâ nostrâ inhonestè aufugerat, vel in Monachorum claustris turpiter consenuerat, ignorantia putidissimæ gregis obscurum. Dolebat magni animi vir literarum vicem: de Græcis actum erat, Latinarum Majestas læsa. Urebat ante alia, ut Deum colendi, ita nec homines juvandi fam extare rationem, ipsamque salutis artem Medicam manum expectare, nec tamen esse qui admoveret. Fœdam rerum faciem vidit, horruit; sed qui in melius refingeret vidit, præter se, neminem; dignum fanè qui eruditum seculum inveniret; vel, quod non invenisset, faceret: Puduit eum Patriæ: Valedixit, nunquam rediturus, nisi Medicinalem saltem Artem, sicubi terrarum delitescebat, in lucem extraheret, sicubi exulabat, secum postliminiò reduceret. Ipsos scientiæ fontes protinus adiisset, nisi jamdiu exaruisent illi fontes, nec superstites essent *sacri*, quos inspiceret,

Libri*. Alexandria dulces moras traxisset, donec locupletem illam Medicinæ suppellectilem excussisset, reportasset: Sed, pro dolor! flammis cesserat Regia illa Bibliotheca: Saracenico occubuerant literæ furori, qui cum scientiis ipsis bella horrenda gessit, easque tantum non ad internecionem delevit: Asclepiadum scholas frustra in Græciâ ipsâ quærebat, libertate exutâ, artibus spoliatâ, quæ, solum mutare coactæ, in terras alio sole calentes gradum corripuere. Certior tandem factus, reliquias Medicinæ, ut olim Trojæ, è suis Achivis elapsas, per varios casus & tot rerum discrimina Latium pervenisse, illuc commeavit, & Doctissimorum Virorum qui huc undique confluxerant consuetudine familiariter usus, id in rebus acumen, in linguis elegantiam, in utrisque famam acquisivit, ut redux, in sapientissimi Regis notitiam protinus deveniret, unusque ex omnibus dignus haberetur, cui Regni spes ARTHURUS, Princeps Juventutis, Marcellus noster committeretur.

CUM in tam lautâ re esset, nihil antiquius habuit quàm ut Medicina, cujus erat, ut doctissimus, ita amantissimus, non in deteriori loco poneretur. Parum se profecisse existimabat, imo abuti, quâ apud duos Reges pollebat, gratiâ, nisi in Artis suæ comoda converteret; nisi ei nitorem, opes, æternitatem conciliaret; nec omnino vixisse, si sibi solum viveret,

* *ἱεργὸ βιβλῶν* erat Libri titulus, in quo regulæ erant præscriptæ, juxta quas Medici apud antiquiores Ægyptios ægrotantes curare tenebantur. Vid. Diod. Sic.

(10)
videbatur. Quid profuit de Græcis scholis toties legisse, Italicas invisisse, si non in Patriâ exurgeret schola, æmula, victrix, quæ tempore quidem sequeretur, dignitate utraque præcederet. Opprobrio erat, Medicinam foris caput extulisse, Academiis foveri; domi egenam, obscuram, circumforaneam, empiricam, scientiæ, splendoris expertem esse. Dolori erat grassari indies morbos, omniumque teterrimum Nebulones istos, Medicorum nomen ementitos, Carnificum dignos, qui sicariorum more, in quos inciderent Homines, impunè jugulabant: Effrœnatam nocendi licentiam cohibendam, saluberrimæ disciplinæ gloriam quovis pretio redimendam censuit: Quod tum demum fore intellexit, si, ut Palladium delapsum Troja, Caput effossum Roma, quædam Imperii pignora habuerant, ita hæc Civitatum amplissima Artium Reginam haberet, quæ in Arce collocata, Bibliothecis instructa, sociis Disciplinis cincta, jura sua promeret, & Urbis fata feliciter distineret.

Ex votis cessit, quod præclarè excogitasset. Doctissimi undique conquisiti sunt viri, qui invictissimi Principis Auspiciis, LINACRI ductu, societatem conflarent; ut onus quod singuli ferendo non essent, junctis viribus sustentarent; ut Conjunctionem quandam pro salute civium inirent, & ne quid Respublica detrimenti caperet, in perpetuum caverent. Positis, bonis avibus, Collegii nostri fundamentis, qui posuit auxit, privilegiis ornavit, lege munivit. Ut Comitiiis agendis locus, se vivo, suppeteret, ædium suarum copiam

piam fecit; ut mortuo etiam, eas testamento legavit. Ne Præsidis fedi Honos deesset, ipse multos annos tenuit; ne fociis Libri Medici, ipse optimè conscripsit; ne Romanæ linguæ Dignitas, regulas de emendatâ sermonis structurâ tradidit, quas facundo suo exemplo confirmavit. Ut Pomœrium Collegii quodammodo proferret, & nova soboles, in hujus societatis Honores olim adsciscenda, ex Academiis semper accresceret, Prælectiones, Oxonii duas, Cantabrigiæ unam instituit, honestisque stipendiis cavit, ut essent qui Hippocratem elucidarent, & Juventuti Medicinæ studiosæ Prophylacticam ejus partem, utpotè utilissimam, ex Galeno depromerent: Quanti enim cunque Pretii sit, mederi posse morbis, antevertere autem, & ut ne omnino sint efficere, majoris esse jure videatur.

SALVE, Vir omni laudè digne, supra omnem posite, qui tum demum benefaciendi finem facere statuisti, cum non alios videres, quibus porro benefaceres: Quam scientiam non salutasti? Quas literas non avidè haufisti? Non modo tuas, sed nostras fecisti, tui seculi Decus, Posteris exemplum? Benè sanè de Rege, de Patriâ, de Academiis, de humano genere meritus es, de nostrâ certè Arte & re optimè; multis Amicus, nobis Amicissimus. Cum, tuâ ope, Regiâ Majestate præfulgeat Album nostrum, & splendidissimis nominibus, ut Ignibus Cœlum, hinc inde micet, ut nullum tuo charius sit, præclarè effecisti. Salve iterum & vale, ut aliis commemorandis suis non de-

fit.

fit locus ; Vale, dixi? Vellem non dictum. Aliorum commemoratio tua itidem est: tuum est, quicquid benè vel invenerint, vel fecerint, & eorum laudes proferre nihil aliud est, quàm tuarum telam per-
texere.

TE igitur excipit CAIUS, eruditus, benevolus, eximius, & ut, quod summum est, verbo complectar, Tui simillimus Vir: Tuis vestigiis institit, ad tuum exemplar se totum composuit. Peregrè Tu ivisti? & ille ivit. In Patriam literas advexisti? si quæ reliquæ erant advexit. Par utrique Ingenium, una Indoles, similis studiorum & vitæ ratio, idem apud illustrissimos Principes Favor, eadem erga nos benevolentia: Quod Tu faciendum reliqueras, Ille fecit; quod addendum, addidit; conditor noster fuisset, nisi illam Tu Gloriam occupavisses: Ita geminus, ut idem ferè videatur, nisi quod Tu primus, ille secundus; ita tamen à te secundus, ut Tu major sis quod illum successorem habueris, ille quod Tu præcesseris. Nascentem hanc Rempublicam, tanquam hæreditario jure sibi traditam, moribus ornavit, autoritate sustinuit, statutis emendavit, Insignibus Gentilitiis decoravit, Cæremoniis augustam reddidit. Annales Collegii quâ elegantia, eâ fidelitate Latinè condidit, digessit: Aliorum facta ab oblivione vindicavit, sua nunquam obliviscenda adjunxit.

VOLUPTATI est nos hæc accepta referre, ut eruditissimo, ita etiam clarissimo Viro, cujus talis erat
existi-

matio, ut nomen ejus non tantum aliis præluceret, sed etiam splendore suo absorberet. Inde fit, ut, quod apud Cantabrigienses post Gonviliū Collegium posuit, CAII solummodo titulum præ se ferre gestiat; eodem planè modo, quo Castoris olim ædes audiebat, quæ Deorum pari ex æquo dicata fuerat. Medicinæ certè primas tenuit; Regiæ saluti ad mortem usque ex officio invigilavit; & in ea conjectus Tempora, quibus Morbus ille Epidemicus, ex fudore nomen habens, grassabatur, unus erat ad quem languida confugeret Respublica, unus, qui moribundam restituit: Non ipso Hippocrate minor, qui Atheniensem illam Pestem profligasse dicitur; eo certè felicior, quòd Patriam servavit. Neque silentio premendum est, hoc ei adeo in Honorem cessisse, ut inter sacra Oracula Ephemera ejus locum haberet, & in Ecclesiis ex Edicto publicè legeretur.

TALI Autore, tanto Adjutore surrexit res nostra; indies crevit, novos Patronos nacta; eosque (quod de Romæ septem Regibus dictum est) *quâdam factorum industriâ, tam varios indole, ut Reipublicæ nostræ ratio & utilitas postulabat.* Multa erant in usum Humanum & Artis famam adhuc invenienda, in Collegii splendorem adhuc desiderata: Accurrunt æmulo quasi ingenio & munificentia, qui invenirent, darent. Solio suo, & pro Temporum ratione satis augusto, infidebat Medicina; at nondum aderant Sociæ Disciplinæ, Administræ Artes; deerat antiquissima ejus pars, quæ manu curat, donec Chi-

C

rurgicam

rurgicam Cathedram CADWALDUS Elizabethæ Reginæ Medicus, nobilissimo LUMLEIO, in auxilium & gloriæ consortium advocato, solerter posuit. Medici apprimè interesse meritò putabat, ut vulnerum naturam scienter calleret, quæ alius, ut Artifex, tractaret.

AT externa curandi vulnera rationem tenere, GULSTONO nostro parum fuit, nisi & quæ intra hominem latuerunt penitus essent evoluta. Conjecturarum nullam certitudinem, nullum finem vidit, nisi oculata fides aliquo modo extaret. Ferro tentandam esse viam censuit; & ne morborum in obscuro positæ causæ, nos aut sæpius fallerent, aut dubios torquerent, Mortuorum Corpora in hoc Theatro quotannis incidenda, scrutanda procuravit, & pathologicam lectionem liberaliter instituit.

QUANTI vero nominis & Pretii sit, hæc apud vos collocata Cathedra, dicat, qui mox implevit, magnus naturæ interpretes HARVÆUS. — HARVÆUS; qui de Arteriarum Pulsu diu sollicitus, & causam ejus eruere millies aggressus, millies elusus, tandem, (quod magnis illis viris solenne est, quorum omnia ad certum aliquem scopum collimant experimenta) desideratissimum illud Arcanum, sanguinis circuitum, seculorum quæ antecesserant opprobrium, sui decus, extudit, vidit; novum Artis nostræ fundamentum posuit, & omni medendi rationi ansam præbuit. Tum demum, ferò licet, intellectum est, Vitam nihil aliud esse quam sanguinis fluxum in orbem actum; quod
illum

illum motum læderet, morbum; quod sifteret, mortem afferre. Ille hominum primus purpureum, ignotum illud æquor impigrè intravit, curiosè perlustravit, feliciter circumivit, de Patriâ, de Humano genere nihil non meritus. Philosophorum Pater, qui Propositionem ad Vitæ usum pertinentem, sacrificio dignam judicavit; quot mille sacris benè emptum esse existimasset, quid ipsa Vita sit, quid Animalium generatio, invenisse, dixisse? Re palam factâ, obstupuerunt omnes: Primò non credere, laceßere; dein invidere, sibi arripere; postremo mirari, venerari: Agant pro suo arbitrio Homines; quicquid agunt, nolint, velint, tuæ, Præstantissime Vir, laudi inserviunt. Hypothesin tuam falsi insimulant? Ad examen revocas, experimentis firmas, demonstras. Inventum aliis apponunt? At Tuum esse invictis argumentis probas, & ut ne sit postea de inventore dubitandi locus, facis. Alii ex aliorum artificiis, ex statuis seu æreis, five marmoreis, sed brevi interituris, vanâ & umbratili Immortalitatis spe, se lactare satagant; Tu in tuis scriptis mori nesciis, veram & optimam invenies. Viget, & dum hominibus profunt medendi Artes, & sanguis eundo redeundo suum in circulum iter repetet, vigebit tua Gloria: Imo nostra; cum Tu noster fueris, & omnia quæ tua sunt nobiscum communicare volueris. Cœnaculum & Musæum tuis impensis extracta, Bibliothecam tuis Libris auctam, ipsa Artis tuæ Instrumenta, tuâ liberalitate suppeditata habemus: Tibi menstruum, tibi annum hoc Convivium debemus: Et ne quid impediret quò minus te in nos

totum effunderes, tuum ex aſſe Patrimonium, te vivo, vidente, donante, hilari, Epulis tuis accumbente, raro Exemplo accepimus.

UTILISSIMARUM rerum Inventores primi homines in Deos evexêre; quòd nimium tribuerent, ſuperſtitiſi forſan; nos, ſi minus quàm oportet tribuamus, ingrati jure videamur. Magnum ſonat, & neſcio quid ingenii, indiſtriæ & felicitatis præ ſe fert, de tramite fortiter deſlectere, nova ſalutis inire conſilia, de tuo promere quod in uſum apprimè fit, & hominibus prodeſſe eo, quo non alii modo ante profuerunt. Tales erant, LOWERUS, qui Cordis (quod dolis ſuis Medicos non minus quam Theologos luſerat) fabricam & Muſcularem vim clarè explicuit: WHARTONUS, qui humorum officinas in Oculis & Ore & Cute, lachrymarum, ſalivæ, ſudoris origines, mirâ ſagacitate apperuit: GLISSONUS, Anatomorum ſui temporis facilè Princeps, qui Jecori vera ſua officia aſſignavit, & Bilem ſplendidam, Ingenii fomitem, ſeparare conſtituit: WILLISIUS, qui Cerebri ſtructuram accuratè retexuit, & Nervorum fila, ſentiendi & motûs inſtrumenta, in omnes Corporis partes ab ortu ſuo deduxit. Hi ſunt, qui intra unius ſeculi & Gentis Limites nati, earum rerum inventarum gloriâ eſfulgent, quarum unaquæque, quicquid ubivis terrarum unquam excogitatum fuerit, æquat, quæ autem omnes ſimul ſumptæ, magno intervallo etiam ſuperant. Neſcio quo fato, aëris Temperie, vel Temporum Genio fit, ut clariffimi Viri aut ſimul exiſtere,

aut

aut alius alium quàm proximè sequi, ament: & cum illæ Mundi Ætates sterilitate quâdam laborant, hæ Ingeniorum messe lætæ exuberant. HARVÆANO hæc illustria Nomina juxtà adponenda esse censui, propterea quod inter ea confortii aliquid esse videatur, quædam Inventorum series, Gloriæ communio. Natura scilicet, Immortalis illius Viri armis expugnata, victa, deprensa (quasi post arcem captam nihil amplius esset quod celare & defendere aut posset, aut vellet,) è latebris exivit, & se totam in conspectum pudibunda dedit.

HIS MAYERNIUS, Inventoris itidem titulo superbiens, adnumerari jure possit; Urbis transmarinæ quidem Civis natus, sed noster factus, Regum nostrorum Archiater constitutus, & in Collegii hujus sodalitium adscitus; dignus certè ob unicum *Calomelanos* inventum, quem nobis vindicaremus; quàm dignus qui in Commemorationis hodiernæ partem vocetur, Vos probè novistis, quibus in comperto habetur, qualia Morborum Monstra, Herculeo hoc remedio quotidie domantur. Imo quòd diræ illi labi, quæ ipsum Leporum fontem, heu! nimium frequenter inquinat, in alio Medicaminis genere, vix tutum sit præsidium.

FAMÆ vestræ dispendium esset, nobilissimum DURN-
NOVARIÆ *Marchionem* silentio præterire, qui se satis ad
Gloriam vixisse non existimavit, nisi & Medici nomen
suis Titulis infereret, nisi in societatem vestram coop-
tatus, famâ eam augeret, libris locupletaret; officiis funge-

fungeretur, & aditum ad vos futuris Patriciis, præclaro exemplo aperiret, honestaret.

NON de Diis solum, sed Deabus etiam suis Medicis gloriatur fabulosa Antiquitas. Illustres apud alias Gentes Fœminas Artem salutarem exercuisse prisca Annales tradidère; illustrissimas apud nos bene fecisse, nostri narrare gestiunt. Ne quid pulchri vobis desit, MARIAM & ARABELLAM STUARTIADAS, inter vestræ rei Autores; nequid Generosi, NOBILISSIMOS PERISCELLIDIS EQUITES, inter socios vestros numeratis.

INTERPELLANDIS verò gaudiis vestris paulisper locus sit, neque vitio vertatis, me candidum hunc diem funestare, & inter Triumphos clades etiam recensere. Damna vestra æquo animo ferenda, audienda sunt, ut ejus qui refarcivit nomen audiatis, & in æternum colatis. Ea ferè est rerum humanarum fors, ut varias formas induant, vices subeant, & quasi in proclivi sitæ, externis causis impulsæ, suâ mole actæ descendant, & ad interitum properent: Neque satis est eas semel optimis Auspiciis posuisse, nisi & adsit, qui labentes sustineat, imminutas augeat, pessum datas instauret. Hanc HAMÆI nostri Gloriam esse facilè intelligitis, qui cum Conditoris nomen alius præripuisset, illi proximum occupavit, & nos labefactatos in integrum restituit: Sub hastâ positas, (horresco referens!) has ædes & pretio addictas Amicissimus HAMÆUS vidit, nec tulit; pretium solvit, redemptas reddidit. Medicinam de folio deturbatam, bonis exutam,

exutam, foras projectam, ære alieno obrutam, manu levavit, in sede suâ placidè reposuit. Vix respirandi, vix gratiis agendis locus est datus, cum novarum occasio exoriebatur. Invicta illa flamma, seu Cœlis delapsa, seu ab Inferis petita, quæ per amplissimam hanc urbem grassata, neque profanis, neque sacris ædibus pepercit, has etiam, heu! frustra redemptas, solo æquavit. Advolavit HAMÆUS, ex aliis corrogavit, de suo addidit, quod iis de integro extruendis sufficeret; eoque effecit, ut Londinensium Civium Nomina, inter Reges, Regiamque sobolem, illustrissimorum Doctissimorumque Virorum Titulos, insignem locum in Tabulis nostris fortiantur. Nec ædificâsse HAMÆO satis fuit, nisi & ornaret, nisi Conviviorum locum, ad sui animi speciem, id est, magnificè instrueret. Imo ut, quæ aliis benefecerit, ad nos etiam pertinere doceret, Nosocomiorum Medicis ampla stipendia assignavit, ea lege, si è nobis eligerentur, vel nostro saltem suffragio digni judicarentur. E Prædiis tandem quæ lauta, & situ proxima erant, nobis moriens legavit.

VIR tot nominibus charus, & tanta de re nostrâ meritus; quem prius sibi apponi mallet, quàm SYDENHAMUM, de arte nostrâ optimè meritum, dignum sanè, si quis alius, qui nostræ Gentis Hippocrates appelletur, utpotè qui (uti de illo Medicinæ Antistite, si benè memini, dictum est,) *Naturam sequendo eidem imperavit*. Morbos certè, quorum Historiam contexuit, tam sollicitè observavit, fideliter descripsit, benevolè communicavit, ut tantum
à neg-

à negligentia quantum à fraude, tantum à fraude, quantum ab invidia abhorruisse, & errandi locum nec sibi, nec aliis reliquisse, videatur. Cum vero id solummodo sibi Gloriæ fore, si quid aliis beneficio cederet, existimaret, an melior ipse Medicus, an Vir fuerit, inter dubia reliquit. Præclarè fanè cum Medicinâ actum esset, si omnes, magni hujus Magistri vestigia prementes, eandem operam, strenuè navassent, & missâ suâ quisque hypothesi, observando quàm fingendo vacare, prodesse quàm delectare, maluissent: Tardior eorum quidem gloria, sed diuturnior fuisset; minus sibi forsan placuissent, at alios miro modo juvassent. Verum enimvero, Judicio uti quàm Ingenio indulgere, quo difficilius eo rarius; adeo ut quanto magis hoc optandum, tanto minus sperandum sit.

ÆGRE ferret, honoris qui sibi proprius est, expers RADCLIVUS, Oxoniæ suæ Decus & Invidia: Decus, quod æs ingens, tantâ suâ Laude, & Artis emolumento, ibi collocavit; Invidia, quod literis leviter salutatis, Ingenii vi solum innixus, eò felicitatis & famæ provectus est, ut, in seculo eruditorum Medicorum feraci, & mediâ celeberrimæ hujus Urbis frequentia, se solum Medicinæ sacris initiatum gloriaretur, & Doctos, Indoctos, Magnates, Plebem, (mirum dictu!) in sua verba jurare paratos aut haberet, aut faceret, Vir Magnificus, natus Medicus, non factus, observandi acer, dignoscendi solers, expediendi acutus. Usque adeo sese effert natus animi vigor, lumenque

menque omne, literarum studiis accensum, splendore suo superat penitus & præstringit.

Ad tempora vobis propiora, orationis filo deductus, venio; ut eorum manibus litem, quorum convictu diutius frui non licet. Duorum enim è nostris fociis ora, frustra sum, dum in hoc literato confessu quæro. Sed à questu temperate: Qui aliorum fata toties distulerunt, suis occubuere. Abierunt nimirum, & vitæ stadio feliciter emenso, è conspectu nostro se receperunt, ut, postquam ante se natorum laudibus piè inserviissent, suis tandem locum darent.

Ut denascendi tempore, ita & nomine prior veniat RICHARDUS HALÆUS, nec, quòd rusticius paulò defluat toga & ferocius introeat, minus vobis gratus, qui diuturnâ consuetudine novistis, quàm bonus, quàm amicis concinnus fuerit. Dicendi nempe libertate, & vivendi ratione, ut simplex & optimæ fidei Vir existimaretur, virtute suâ, ut esset, comparavit. Græcis literis addictus, in nullis hospes, Homerum, utpote earum fontem, adeo in deliciis habebat, ut totum memoriâ retineret, pro re natâ festivè recitaret; imo, circuitûs HARVEANI vestigia Vir solers in eo colligeret. Nec erroris temerè postulandus est, quòd scientiarum artiumque omnium Patrem crederet; si quas enim in eo non inveniebat, de suo addebat, & cum dilectissimo vate benevolè communicabat. Cum nullam Medicinæ partem non probè calleret, eam, quæ Infanientes spectat, prosperè excoluit. Quot Re-

D
ges

ges Reginaſque de folio ſuo ſtramineo fortiter deturbavit, quos furore percitos lenivit, atra bile conſectos erexit, delirantes ad ſanam mentem reduxit, dicant annales Bethlehemetici, dicant illi hominum miſerrimi, quos patriæ, amicis, ſibi, feliciter reddidit. Ut literas ipſas, ita & literarum apud nos ſedes perditè deamabat; Academiae utriuſque & Collegii huius utroque Pollice eo uſque fautor, ut nihil ingenuum, nihil præclarum, nihil laude dignum, aliunde oriundum eſſe agnoſceret; nimio fortè ſtudio, ſed amabili, abreptus, quippe qui Patriæ ſtudebat. Pignus amoris, quo Artem noſtram & rem ſemper fovebat, quingentas libras in Medicæ huius Bibliothecæ augmentum, moriens reliquit.

AD clariffimum Virum JOHANNEM FREIND ordine accedo: Dignum certè quidem qui omnes laudandi opes exhauriat, atque ita commemorationi hodiernæ finem imponat. Ille hoc noſtrum munus claudat, qui uſque eò ornavit, ut futuris oratoribus injurius eſſe videretur, ſi non ſe prædicandum reliquiſſet. Vix enim è vitâ exceſſerat, cum omnes deſiderare, mirari, efferre inciperent, meliora optare, majora dicere, quàm quæ aliis unquam dum viverent, falſi ingenioſa, ſui ſtudioſa, dixit Adulatio. Gloria ſcilicet, quo minus in conſpectum Viri, laudis minimè appetentis, erumperet diu reſſeſſa, in abſentem ſe totam effudit, & citis pennis aſſecuta, in Cœlum ſuum protinus eſcit. Tantæ famæ femina, in ſcholâ Weſtmonaſterienſi, ſolo ingeniorum feraciſſimo, jacta, in immenſam

sam fegetem excreverunt in Christi apud Oxonienses Æde, turritæ Deorum Parentis ad instar, fæcundâ maximorum Virorum matre; ubi pro suo & loci genio humaniores omnes literas excoluit eximius Vir, recto cultu fortissimum pectus roboravit, & quantum præclara indoles doctrinam, doctrina vim promovet infinitam, feliciter ostendit. Quàm Græcè, quàm Latinè sciret, testis sit Hippocrates suus, quem ad exemplaria Græca acutè emendavit, Commentariis Latinis nitidissime illustravit. Quas ei habeat gratias sexus ille, quem circum Jocus volat & Cupido, dicat liber in ejus usum, eâ quâ decuit elegantia, concinnatus. Ad philosophiæ penetralia adiisse adstipuletur Chemia, cujus labores examini subjecit, omnesque cum NEWTONIANIS, id est, Naturæ Legibus, composuit, conciliavit. Variolarum Theoria, si Experientiæ Fides accederet, auro contrà pretiosa, Ingenii argumentum; quod Ingenio illi non sæpius indulgeret, Judicii jure habeatur. Quàm rebus gestis fide eruendis, dilucidè, ornatè narrandis, si huic muneri vacasset, aptus esset, ea, quam patrio sermone continuavit Historia, palam fecit. Quàm in omni demum Literarum genere exercitatus, fidem faciunt quæ scriptis, factis edidit specimina, iis tantum minora, quorum ipse spem indies accendebat.

TANTA de uno aliquo viro prædicari, magnum quidem est; majus autem, quod de tali viro prædicantur, qui nihil suum esse duxit, quod aliis beneficio esse posset. Si quid eximii, si quid reconditi habuit, (quid autem utriusque non habuit?) non

solitaria famâ contentus, in apertum liberè protulit. Scivit egregiè? ut alii itidem scirent, operam sedulò dabat. Medicinæ peritus fuit? ut alii etiam essent, studio flagrabat. Gloriam attigit? si aliorum accenderet, lucro apponebat, alienæ inserviens, suæ profusus. Secundùm Divini Senis effatum, * *ideo Artem suam quamplurimum amans, quia Hominum amantissimus.* In malam rem abire jubebat, qui nescio quod Arcanum superbè venditabant; si non haberent, falsos, si celarent, invidos; utroque nomine aut neglectui aut odio habendos. Id nimirum Patriæ, id suo & Artis commodo inserviturum esse putabat, si alios sui similes inveniret, vel, quoad posset, faceret: Et ut essent, omnia sua cum illis communicabat, præceptis instituebat, exemplo præibat. Imperitiam Medico non opprobrio solum, sed crimini vertere solebat; & Mortuo nihil interesse, seu ignorantia seu fraude periret, benevolè dictitabat. Principibus placuisse viris non ultima ejus laus est; maxima verò & displicuisse, cum ex illorum re esset: Magni enim animi Vir, spe & metu major, nec lucri, nec famæ studio cessit, quid alii sentirent minimè sollicitus, dummodo sibi recti conscius foret, quo eruditior eo fortior illis apud Celsum Medicis, † “ *qui in splendida Personâ periclitari conjecturâ suâ noluerunt, ne occidisse, nisi servâssent, viderentur.*” Cum autem CAROLINÆ, perspicacissimæ omnium REGINÆ, non nomine solum tenus Medicus fuerit, quâ fide sanctissi-

* Ἡν γὰρ παρῇ φιλανθρωπίῃ, πάρεσι καὶ φιλοτεχνίῃ. Hippocrat.

† Celsus in præf. lib. I.

mæ ejus salutis invigilavit, quâ felicitate conservavit, dicat illa, quâ apud eam valuit, Gratia. Academiæ suæ Decus, utriusque deliciæ, utramque maximi æstimavit, & in perpetuum amoris testimonium, eam reliquit legem, quâ, ferente illo, jubentibus vobis, cautum est, ne hujus loci sedes, nisi Academiarum nostrarum filiis, in futurum pateat.

CUM legendis, condendis libris incumberet, & quotidianis muneris sui officiis occuparetur, nec suæ, nec alienæ mille curæ circa Caput salientes, impedimento erant, quo minus Rempublicam capefferet, auspicato die Regni senatum intravit Vir ad omnia natus, & sedem suam dignitate implevit, eloquentiâ ornavit. Medicinam prosperè fecerat, scriptis illustraverat, famâ auxerat; deerat in laudis cumulum, ut periclitanti opem ferret, in discrimen adductam eriperet. Nec in Morâ res fuit; hanc etiam merendi partem oblatam avidè arripuit, fortiter explevit: Collegii hujus jura, avita, sanctissima, Regum dona, erant qui in jus vocabant, imminutum ibant: Accurrit, dixit, propugnavit literarum fautor, artium patronus: Argumentis, autoritate, gratiâ, suâ & Artis felicitate, omnes in unam sententiam discedentes habuit, & Privilegia nostra, non tantum facta tecta servavit, sed confirmata, ampliata reddidit. Stetit Reipublicæ nostræ fortuna, illibata, integra, splendida, Præstigiatorum Opprobrium; quòd oppugnata fuerat, illustrior; quòd infidiis petita, munitior; quòd à malevolis odio habita, bonis omnibus charior.

EJUSDEM

EJUSDEM Viri, ejusdem animi erat, rem nostram foris defendere, & intra hos Parietes sedulo curare. Eo consilio, (ut meminisse juvat!) comitiis, exercitiis nostris lætus adfuit; imò ut essent, quibus adesse posset, gratiâ suâ comparavit. Cum enim, nescio quo malo fato, hæc in defuetudinem abiissent, vestram opem implorabat, suam pollicebatur, per vosmetipsos, per Majores vestros, per Amicitiam, per Gloriam orabat, ut in integrum restituerentur, ut huc commeandi locus foret, ut vestrâ consuetudine uteretur, suæ facultatem præberet; ut convivia honesta, colloquia dulcia instaurarentur; ut in conspectum mutuum venire, ut audire, ut dicere, quæ in Artis commodum, Literarum incrementum, Collegii honorem, bonum publicum cederent, denuo liceret. Annuistis voto, idem enim vobis & illi morum candor, eadem studiorum ratio, animi magnitudo: Voto annuistis; ne illius, ne Majorum Labor effusus esset omnis: Voto annuistis; similes enim similibus gaudent, fruuntur, & ad meliora mutuo commercio & exemplo finguntur. Sordes, solitudinem ex hoc loco præclarè depulistis; nitorem, frequentiam restitulistis. In dilectissimi Viri sententiam cupidè ivistis; novistis enim, quàm non leve esset quod promittebat, cum sui copiam familiariter faceret. Qualis in inimiciâ erat, dicant, si quos habuit, Inimici: In Amicitia qualis, illorum solummodo est dicere, qui sunt experti; qui subsecivis ejus horis aderant, cum à negotiis recederet, Genio indulgeret, amicis vacaret; cum Pectus illud generoso

neroso incoctum honesto recluderet, utile dulci misceret, & omne punctum ferret, non amans magis quàm amatus, non amatus magis quàm amabilis. O præstantissimum, beatissimum virum! cui ex parvis rebus, æquè ac è maximis, accrescit decus; cujus inter minimas laudes ponendum est, quod supra alios sciret. Suâ, id est, amplissimâ fruatur famâ, qui nullius laceffivit, nullius non auctiorem optavit, fecit. Felicitatis loco habeo, quod votum tandem implevi; quod sacro nomini hoc debitum munus persolvi, quod de ingente ejus Gloriâ pauculos decerpisse flores, & vobis obtulisse contigit: Juvaret fanè hîc loci consistere, novas dicendi Causasnectere, & Charo Viro diutius immorari, nunquam dimittere. Ægrè à dulcissimo amplexu divellor: Recedendum verò est, invito licèt, ne limites sibi appositos transfiliat oratio, ne importunus, Loci, Temporis, Officii, immemor esse videar, & in Clarissimi viri famam, minuendo, ulterius peccem.

Vix autem ab eo discessisse viderer, si ad vos accedere, & variis eximiis vestris laudibus me immiscere liceret: Si ad PRÆSTANTISSIMOS VIROS, omni ingenuâ Arte, Eruditione, Doctrinâ, excultos, politos, transire fas effet; ILLUM, qui Præsidis munus per multos annos sustinuit, ornavit, auxit, & Gloriæ tandem fatur, deposuit; HUNC, qui sustinet, ornat, nullâ non famâ & spe impertit. Sed Religio est, dicendi Magistris olim illustranda, tenuitate meâ temerare, & mihi ipsi placere, si vobis molestus sim. Ve-

tat loci consuetudo, revocant Majorum Instituta, Commemorationis Lex, è conspectu nostro sublatis sacræ. Vestrum est maximas res præstare, nostrum videre, mirari; aliorum erit cum dignitate dicere, cum voluptate audire. Interea tamen loci, quod benè vertat! pergite, ut facitis, ornatissimi Viri, magna edere, majora promittere, Artis vestræ honori impigrè studere, Civium saluti prosperè invigilare, vitæ & Gloriæ circulum feliciter implere. Serò illustrissimis Viris adnumerari vobis contingat, qui, quicquid illi aut erant, aut sperarent, estis. Diu vos expectent virtutis præmia, ut quo diutius dilata, eo pleniora redeant. Prædicationis omnibus numeris absolutæ tum demum locus erit, cum agendi vobis non amplius fuerit; cum emeriti, evocati, Vitâ defuncti eritis, (favete linguis!) cum Immortales esse incipietis, Orationum, quoties illuxerit hic festus dies, materies læta, copiosa, splendida, invidenda quidem, sed aliis relinquenda.

